

地 110
9427
部 2

北平史蹟叢書

顧祖剛題



國立北平研究院史學研究會印行

北平史蹟叢書

顧祖剛題



北平史蹟叢書序

中國宅京之地。最歷久不遷。且未經中斷者。莫如北平一地。世祿之家長子孫。往往與國同休戚。士大夫萃處於其間。講學問。立事功。通聲譽。交賢達。廣視聽。拓胸臆。無不就京師人海中。各得其所成就。而卓然暴白於世。其下者營謀利達。奔走貴顯。亦無不輩致世所難得。而聚於所好之門。於是書籍圖錄藝術玩好。自經緯天地平治國家。下至陶寫性情。順適嗜欲之事。娛耳目。便肢體。悅口腹。恣盡惑。其鬻於市。其藏於家。其掌於官。其習於匠。其成於俗。其淹於雅。形形色色。美富甲天下。而有通人韻士。載筆於其間。一經敘述。每爲全國所嚮慕。何慕乎爾。蓋其關涉京師記載之人物。皆全國故家之祖述。達士之師授。人門之先德。地方之遺獻。一展卷而累見之。則所慕乎京師者。非徒爲首善之一地。實并所親所尊。所敬所愛。所願學。所求訪。其遺文軼事。而不得者。胥於此焉。遇之。孟子有言。所謂故國者。非謂有喬木之謂。夫安得不取其一記一識一話一言。而皆以瑰寶視之也。張君次溪。早承家學。性好方聞。久居舊京。日涉文藪。有懷舊思古。

序

一 北平史蹟叢書

國立北平研究院史學研究會

之意。適具徵文考獻之才。又值當途好事網羅舊聞之日。出其所得。哀爲北平紀述之大觀。甚盛舉也。夫山河大地。造物之靈秀鍾焉。然同一土地。或稱荒穢。或擅名勝。坤輿不能自爲主也。子厚作記。而柳州之泉石始名。康樂吟詩。而永嘉之山水大著。伽藍名園有記。而洛陽長在人心。夢華夢梁有錄。而東京不隨運盡。北平之爲北平。作者尤多。以清一代言。直可截時世以規風氣。順康之雍容。非故明末運之噍殺也。雍乾之畏謹。又非開國時之博大有容也。嘉道之守文。拘束極而漸迫於事變。輦下遂有講學之風。而開一時經濟事功之路。咸同之撥亂反正。氣象漸重外輕內。而名輩索然向盡。所謂人文之淵藪。略存軀殼而已。至光宣母后臨朝。黨禍倚伏。賄賂公行。士大夫一咏一觴。無復從容寧靜之致。由此蒐其見諸文字者。爲史家知人論世之資。瑣且穢者亦可具存。但取其紀述之有法者。風會自有隆污。筆墨初無滄敵。以此成一叢載之書。其於規國揆世。功有過於獨特已見之書。自欲言朝局政情民風。士習者遠甚。張君例言。謂必取罕見者而表章之。此則太拘。可裨史蹟者合衆散而爲一大聚。雖原有單行人。非難見。彙而比之。卽臨淮壁壘矣。并以此奉商可乎。二十六年歲首。孟森書。

北平史蹟叢書刊印緣起

秀水朱彝尊以史官供直內廷。被謫後仍居宣南海波寺街。以燕京爲掌故淵海。慮舊聞放失。乃發奮編日下舊聞一書。當其時也。海宇承平。好古敏求之士。又皆萃於是邦。朱氏久負重聲。聞風依附者衆。于是凡有珍聞。則錄以奉之。凡有奇書。則爭以獻之。故逮是書告成。而採用有關此間歷史風土之書。已達一千三百種。宜乎其書爲世所重也。惟朱氏所經引用之書。如孫國敕之燕都游覽志。陸啓滋之客燕雜記。馮勗之六街花事等數十種。極關史蹟。度必有朱氏未盡采者。今不可復得。徒令人抱憾而已。比歲本會纂修北平志。材料之採擇。重在調查。而同時兼重者。即搜羅往籍中有關斯土之紀實文字。以爲佐証。顧年來所得爲數極尠。蓋朱氏去今幾二百年。中經變亂。散亡殆盡。即目今所見者。固亦有一二罕見之本。已盡量采錄。然以體例所限。終不免遺珠之憾焉。且圖書聚散無常。在今日以爲習見者。過此或竟絕響。則刊印北平史蹟叢書。又今日所不可稍緩者矣。當世藏書家有能餉我奇書。宏茲盛業。使此叢書由一輯編印以洎多帙者乎。是更本會同人所深禱企者已。

緣起

一 北平史蹟叢書

國立北平研究院史學研究會

凡例

- 一本叢書專收前人紀載北平古蹟民物風俗文獻之著述。不論已刊或稿本。擇其少流傳者爲甲集。
- 一前人記述北平史蹟文字。而散見諸家筆記叢錄者。分別摘錄。編印北平史蹟叢編爲乙集。
- 一前人題詠北平景物之專集。確係流傳絕少者爲丙集。
- 一今人關於北平風俗之紀實專著爲丁集。
- 一每輯所收不拘時代。以得到先後爲次。

帝京歲時紀勝

清潘榮陞著

北平史蹟叢書第一種

顧頡剛題



帝京歲時紀勝序

昔劉宗正校書天祿。有說苑雜記諸書行於世。而後之爲雜說者宗之。如班令史之侍讀禁中而作白虎通。蔡邕之校漢典而作獨斷是也。嗣此則唐宋諸家。短裁促筆。各自爲書。不必盡出秘府。致長安舉人。淨房佛殿。爭相寫記。爲銷夏之舉。謂之夏課。元明以來。山人園客作稗官。墅乘。以誇詡聞見。故說者謂談議之盛。至唐後始備。而不知漢書藝文。已早有雜說千家。見於書目。陞自辛亥秋。從事禁庭。癸丑冬。奉置史館。叨窺內府圖書。金匱石室之秘。而充櫛負櫛。滙今古藏書之所未備。然陞恭膺宮闕。制作督銷之職。晨入夜出。負星而趨。曠亦何嘗有頃刻之暇。可涉筆札。乃自丙寅冬。告養歸來。凡有所經歷者。隨意記錄成帙。如工務紀由。月令集覽。昏儀便俗。讀禮須知。曠懷閒草諸書。搜微剔隱。詳加刪訂。惟是皇都品彙萬方。澤流九有。而歲時令節。風土景物。典儀之盛。遠邁前古。豈可茫無記述。因自不揣鄙陋。敬以耳目之餘。彙集爲編。顏曰帝京歲時紀勝。而謬以促筆短裁。雜志街談巷語。略記熙朝景物儀文之盛。匪敢以蟬鳴蛙響。妄附

帝京歲時紀勝

序

一

北平史蹟叢書第一種

國立北平研究院史學研究會

鼓吹於盛世休明也。是爲序。

乾隆二十三年戊寅冬月長至穀旦大興潘榮陞在廷甫識

帝京歲時紀勝題詞

姚成勳

昌谷詩傳十二月。未聞景物紀京師。知君自具鑪錘手。巷議街談絕妙詞。
天家日月長如許。十載勞人未熟諳。別有情懷消不得。賣花聲裏憶江南。

顧學乾

里巷謠謠傳自古。帝京風物冠殊方。從君攔入生花筆。信有東華塵土香。
漫勞校勘費鉛黃。字字應皆出錦囊。白老歌詩通僕隸。蘇仙笑罵盡文章。

帝京歲時紀勝

題詞

一

北平史蹟叢書第一種

國立北平研究院史學研究會

帝京歲時紀勝目錄

正月元旦 進春 春盤 星燈 喇嘛打鬼

天誕 琉璃廠店 上元 三元 煙火

走橋摸釘 歲時雜戲 燕九 填倉 禁忌

時品

二月中和節 薰蟲 惜字會 花朝 道誕

觀音會 時品

三月清明 赦孤 蟠桃宮 東嶽廟 時品

四月立夏 結緣 天仙廟 藥王廟 豐臺芍藥

時品

五月端陽 禁汲 天壇 都城隍廟 里二泗

關聖廟 夏至 宜忌 時品

帝京歲時紀勝 目錄

北平史蹟叢書第一種

國立北平研究院史學研究會

六月六日 浴象 賞蓮

七月立秋 秋爽來學 七星壇 七夕 蟋蟀

秋聲 中元 地藏會 時品

八月中秋 綵兔 先師誕 時品

九月九皇會 重陽 登高 賞菊 辭青

占雪 鬪鶴鵲 醃菜 夜八出 禁忌

時品

十月送寒衣 占風 燻炕 蛞蝓 安期

白塔然燈 時品

十一月冬至 消寒圖 冰床滑擦 蹙鞠 時品

十二月市賣 臘八 窖冰 祀竈 稽善惡

亂歲 沐浴 丟百病 歲暮雜務 皇都品彙

帝京歲時紀勝

大興 潘榮陞 著

正月元旦

除夕之次。夜子初交。門外寶炬爭輝。玉珂競響。肩輿簇簇。車馬鱗鱗。百官趨朝。賀元旦也。聞爆竹聲如擊浪轟雷。徧乎朝野。徹夜無停。更間有下廟之博浪鼓聲。賣瓜子解悶聲。賣江米白酒擊冰蓋聲。賣桂花頭油搖喚嬌娘聲。賣合菜細粉聲。與爆竹之聲。相爲上下。良可聽也。士民之家。新衣冠。肅珮帶。祀神祀祖。焚楮帛畢。味爽闔家團拜。獻椒盤。斟柏酒。飲蒸糕。呷粉羹。出門迎喜。參藥廟。謁影堂。具柬賀節。路遇親友。則降輿。長揖而祝之曰。新禧納福。至於酌酢之具。則鏤花繪果爲茶。十錦火鍋供饌。湯點則鵝油方補。猪肉饅首。江米糕。黃黍飴。酒餚則腌鷄臘肉。糟鶯風魚。野鷄爪。鹿兔脯。果品則松榛蓮。慶。桃杏仁。栗棗枝圓。檀糕耿餅。青枝葡萄。白子崗榴。秋波梨。蘋婆果。獅柑鳳橘。橙片。楊梅。雜以海錯山珍。家餚市點。縱非親厚。亦必奉節酒三杯。若至戚忘情。何妨爛醉。俗

帝京歲時紀勝

北平史蹟叢書第一種

國立北平研究院史學研究會

說謂新正拜節。走千家。不如坐一家。而車馬喧闐。追歡竟日。可爲極一時之勝也矣。

歐陽原功漁家傲詞

正月都門寒料峭。除非上苑春光到。元日班行相見了。朝回早。闕前梳帕歡相抱。漢女姝娥金搭腦。國人姬侍金貂帽。繡轂雕輪來往鬧。閑馳驟。拜年直到燒燈後。

圭齋集

進春

立春日各省會府州縣衙。遵制鞭春。京師除各署鞭春外。以綵繪按圖經製芒神土牛。畀以綵亭。導以儀仗鼓吹。交春之刻。京兆尹帥兩學諸生。恭進大內。

春盤

新春日獻辛盤。雖士庶之家。亦必割雞豚炊麩餅而雜以生菜。青韭芽。羊角葱。冲和合菜皮。兼生食水紅蘿蔔。名曰咬春。

星燈

初八日傳爲諸星下界。然燈爲祭。燈數以百有八蓋爲率。有四十九蓋者。有按玉匣記

本命星燈之數者。於更初設香楮。陳湯點。然而祭之。觀寺釋道。亦將施主檀越年命星庚記注。于是夕受香儀。代具紙疏雲馬。爲壇而祭。習以爲常。

喇嘛打鬼

初八日弘仁寺打鬼。其制以長教喇嘛披黃錦衣乘車持鉢。諸侍從各執儀杖法器擁護。又以小番僧名班第者。衣彩帛帶黑白頭盔。手執綵棒隨意揮灑白沙。前以鼓吹導引。衆番僧執曲錘柄鼓。鳴鑼吹角。演念經文。遶寺周匝。迎祥驅祟。念五日。德勝門外黃寺。行亦如之。

天誕

初九日爲天誕。禁屠宰。大高玄殿建皇壇。各道觀設醮拜朝天懺。錫福解厄。

琉璃廠店

琉璃廠在正陽門外之西。廠制東三門。西一門。街長里許。中有石橋。橋西北爲公廨。東北樓門上爲瞻雲閣。即審廠之正門也。廠內官署作房神祠之外。地基宏敞。樹林茂密。濃陰萬態。煙水一泓。度石梁而西。有土阜高數十仞。可以登臨眺遠。門外隙地。博戲聚

焉。每于新正元旦至十六日。百貨雲集。燈屏琉璃。萬蓋棚懸。玉軸牙籤。千門聯絡。圖書充棟。寶玩填街。更有秦樓楚館。徧笙歌。寶馬香車。遊士女。此外遊覽之地。如內城馴象所看象舞。自鳴鐘聽韶樂。曹公觀演教勢。白塔寺打秋千者。不一而足。至若皇城內。兔兒山。大光明殿。劉元塑元都聖境。金鰲玉螭橋頭。南望萬善殿。北望五龍亭。承光殿下。昭景門東。觀宮闕之巍峩。見樓臺之隱約。如登海外三山矣。

上元

十四至十六日。朝服三天。慶賀上元佳節。是以冠蓋踴躍。繡衣絡繹。而城市張燈。自十三日至十六日。四永夕。金吾不禁。懸燈勝處。則正陽門之東月城下。打磨廠。西河沿廊房巷。大柵欄爲最。至百戲之雅馴者。莫如南十番。其餘裝演大頭和尚。扮稻秧歌。九曲黃花燈。打十不閒。盤槓子。跑竹馬。擊太平神鼓。車中絃管。木架詼諧。細米結作鰲山。煙炮攢成殿閣。冰水澆燈。簇火燒判者。又不可勝計也。然五夜笙歌。六街驕馬。香車錦轡。爭看士女遊春。玉珮金貂。不禁王孫換酒。和風緩步。明月當頭。真可謂帝京景物也。

三元

十五上元。七月中元。十月下元。爲三官聖誕。曰天官賜福。地官赦罪。水官解厄。設壇致祭。有素食者。正七十齋居三月。

煙火

煙火花炮之製。京師極盡工巧。有錦盒一具。內裝成數齣故事者。人物像生。翎毛花艸。曲盡粧顏之妙。其爆竹。有雙響震天雷。陞高三汲浪等名色。其不響不起盤旋地上者。曰地老鼠。水中者曰水老鼠。又有霸王鞭。竹節花。泥簫花。金盃撈月。疊落金錢。種類紛繁。難以悉舉。至于小兒頑戲者。曰小黃煙。其街頭車推擔負者。當面放。大梨花。千丈菊。又曰滴滴金。梨花香。買到家中哄姑娘。統之曰煙火。勳戚富有之家。于元夕集百巧爲一架。次第傳熱。通宵爲樂。

公廩都城元宵曲

鰲山綵綉五雲隈。白果園中玉帳開。傳語侍臣休放馬。君王月下打圍來。
黃瓦墻頭艷畫歌。直從析木象銀河。三三五五橋頭去。贏得相思滿綠波。
曲砌迴廊卍字闌。松瓢亭子月中看。金鑪休放沉香火。醉擁如花夜不寒。

帝京歲時紀勝

三

北平史蹟叢書第一種

國立北平研究院史學研究會

白袷裁衫玉滿頭。短擔整髻學蘇州。儂家新樣江南曲。縱是愁人不解愁。小東園

詩集

走橋摸釘

元夕婦女羣遊。祈免災咎。前一人持香辟人。曰走百病。凡有橋處。三五相率以過。謂之度厄。俗傳曰走橋。又兢往正陽門中洞摸門釘。讖宜男也。

周用走百病行

都城燈市由來盛。大家小家同節令。諸姨新婦及小姑。相約束粧走百病。俗言此夜鬼穴空。百病盡歸塵土中。不然今年且多病。臂枯眼暗兼頭風。踏穿街頭雙繡履。勝飲醫方二鐘水。誰家老婦不出門。折足蹣跚曲房裏。今年走健如去年。更乞明年天有緣。蘄州艾葉一寸火。只向他人肉上然。去年同伴今希有。幾人可卜明年走。長安主人肯居停。寂寂關門笑後生。但願中秋不見月。博得元宵雨打燈。周

恭肅公記

歲時雜戲

元宵雜戲。剪絲爲燈。懸挂則走馬盤香。蓮花荷葉。龍鳳鰲魚。花籃盆景。手舉則傘扇旛幢。關刀月斧。像生人物。擊鼓搖鈴。迎風而轉者。太極鏡光。飛輪八卦。擊拽而行者。獅象。羚羊。騾車。轎輦。前推旋輪爲橄欖。就地滾蕩爲繡球。博戲則騎竹馬。撲蝴蝶。跳白索。藏。矇兒。舞龍燈。打花棍。翻筋斗。豎蜻蜓。閑常之戲。則脫泥錢。踢石球。鞭陀羅。放空鐘。彈拐子。滾核桃。打茶茶。踢毬子。京師小兒語。楊柳青。放空鐘。楊柳活。抽陀羅。楊柳發。打茶茶。楊柳死。踢毬子。都門有專藝踢毬子者。手舞足蹈。不少停息。若首若面。若背若胸。團轉相擊。隨其高下。動合機宜。不致墜落。亦博戲中之絕技矣。

燕九

白雲觀建於金。舊爲太極宮。元改名曰長春宮。明正統間重修。改名白雲觀。出西便門一里。觀中塑邱真人像。白皙無鬚眉。考元太宗師長春真人邱處機。赴元太祖召。拳拳以止殺爲戒。時有事西征。則云一天下。在不嗜殺人。大獵山東。則云天道好生。數畋獵非宜。念西河流徒。則持牒招來。全活不下三萬人。本朝有聖祖御題額四。曰紫虛真氣。曰大智寶光。曰駐景長生。曰琅簡真庭。其所以受國朝之旌祀而立廟貌于無窮者。豈帝京歲時紀勝

帝京歲時紀勝

四

北平史蹟叢書第一種

國立北平研究院史學研究所

異說紛紜。飛昇黃白之流。可擬比於萬一也。真人生于宋紹興戊辰正月十九日。故都人至正月十九日。致醑祠下。爲燕九節。車馬喧闐。遊人絡繹。或輕裘緩帶。簇雕鞍。較射錦城濠畔。或鳳管鸞簫。敲玉版。高歌紫陌村頭。已而夕陽在山。人影散亂。歸許多爛醉之神仙矣。

吳寬燕九日詩

京師勝日稱燕九。少年盡向城西走。白雲觀前作大會。射箭擊毬人馬蹂。古祠北與學宮依。簫鼓不來牲醴稀。如何義士文履善。不及道人邱處機。匏翁家藏記

填倉

念五日爲填倉節。人家市牛羊豕肉恣餐。竟日客至苦留。必盡飽而去。名曰填倉。惟是京師居民不事耕鑿。素少蓋藏。日用之需。恒出市易。當此新正節過。倉廩爲虛。應復置而實之。故名其曰填倉。今好古之家。於是日。糴米積薪。收貯煤炭。猶仿其遺意焉。

禁忌

元旦不食米飴。惟用蒸食米糕湯點。謂一年平順。無口角之擾。不灑掃庭除。不撮棄渣。

土名曰聚財。人日天氣清明。出入通順。謂一年人口平安。服制之家。不登賀。不立門簿。雖有親賓來拜謁者。亦不答拜。初五日後。始往叩謝。名曰過破五。春戊寅日爲天赦。新葬墳墓。於戊寅前期祭掃。諺云新墳不過赦。正月不遷居。不糊窗榻。爲善正月。諺云正五九沒處走。

時品

正月薦新品物。除椒盤柏酒春餅元宵之外。則青韭滷餡包。油煎肉三角。開河魚。看燈雞。海青螺。雛莖鶯。春橘金豆。斗酒雙柑。至於梅萼爭妍。艸木萌動。迎春探春水仙月季。百花接次爭艷矣。

二月中和節祀日

初一日爲中和節。傳自唐始。李泌請以二月朔爲中和節。賜民間以囊盛百果穀瓜李種相問移。號獻生子。令百官獻農書。京師于是日以江米爲糕。上印金烏圓光。用以祀日。遠街徧巷。叫而賣之。曰太陽鷄糕。其祭神雲馬。題曰太陽星君。焚帛時。將新正各門戶張貼之五色挂錢。摘而焚之。曰太陽錢糧。左安門內有太陽宮。都人結侶携觴。往遊

帝京歲時紀勝

五 北平史蹟叢書第一種

國立北平研究院史學研究會

竟日。考春分祭日。秋分祭月。乃國之大典。士民不得擅祀。若以照臨恩當思報之。習俗云可。

薰蟲

二日爲龍擡日頭。鄉民用灰自門外蜿蜒布入宅廚。旋繞水缸。呼爲引龍廻。都人用黍麩棗糕麥米等物。油煎爲食。曰薰蟲。小兒輩懶學。是日始進書房。曰占鰲頭。士民又于是日櫛籬。蓋取龍擡頭之意云。

惜字會

香會春秋仲月極勝。惟惜字文昌會爲最。俱於文昌祠。精忠廟。金陵庄。梨園館。及各省鄉祠。獻供演戲。動聚千人。

花朝

十二日傳爲花王誕日。曰花朝。幽人韻士。賦詩唱和。春早時賞牡丹。惟天壇南北廊。永定門內張園。及房山僧舍者最勝。除姚黃魏紫之外。有天紅淺綠金邊各種。江南所無也。

道誕

十五日爲太上玄元皇帝誕辰。禁止屠割。太清觀各道院立壇設醮。談演道德寶章。

觀音會

十九日爲觀音大士誕辰。正陽門月城內觀音廟。香火極勝。城內外白衣菴。觀音院。大悲壇。紫竹林。廟宇不下千百。皆誦經聚會。六月十九日登蓮臺。九月十九日傳道妙。如前行之。有善信諱大悲咒戒暈酒者。二六九食素三月。

時品

菠薐於風帳下過冬。經春則爲鮮赤根菜。老而碧葉尖細。則爲火燄赤根菜。同金鈎蝦米以麪包合。烙而食之。乃仲春之時品也。至若丁香紫。壽帶黃。杏花紅。梨花白。所謂萬紫千紅總是春。元鳥至。則高堂畫棟銜泥結草以居。至秋社。城村燕各將其雛。于采育東土阜。名聚燕臺。呢喃竟二日而後去。

三月清明

清明掃墓。傾城男女。紛出四郊。擔酌挈盒。輪轂相望。各携紙鳶線軸。祭掃畢。即于墳前

帝京歲時紀勝

六 北平史蹟叢書第一種

國立北平研究院史學研究所

施放較勝。京製紙鳶極盡工巧。有價值數金者。琉璃廠爲市易之。清明日摘新柳佩帶。諺云。清明不帶柳。來生變黃狗。又以柳條穿祭餘蒸點。至立夏日油煎與小兒食之。謂不饑夏。

赦孤

廣寧門外普濟堂收養異鄉孤貧疾瘵人。冬施粥。夏施冰茶。育嬰堂收養棄擲嬰兒。兩堂清明日檢拾暴露骸骨及幼殤小兒殮葬。或化而瘞之。復延僧衆施食度薦。名曰赦孤。又祭厲鬼者。是日設儀仗陳鼓吹前導。昇請城隍聖像出巡。于城南隙地。奏樂薦享。中設神位。傍列孤魂棚座祭賽。焚其楮帛。名曰濟孤魂會。蓋仿古厲壇之遺意焉。

蟠桃宮

蟠桃宮在東便門內。河橋之南。曰太平宮。內奉金母列仙。歲之三月朔至初三日。都人治酌呼從。聯鑣飛鞚。遊覽於此。長堤縱馬。飛花箭灑綠楊坡。夾岸聯觴。醉酒人眠芳草地。

歐陽原功漁家傲詞

三月都城遊賞競。宮牆官柳青相映。十一門頭車馬並。清明近。豪家寒具金盤釘。燔祭留連芳草徑。歸來風送梨花信。向晚輕寒添酒病。春煙暝。深深院落秋千迴。

圭齋集

東嶽廟

朝陽門外二里許。延祐中建廟。以祀東嶽天齊仁聖帝。明正統中。改拓其宇。兩廡設地獄七十二司。殿後爲穿堂寢殿。神像爲正奉劉元手塑。寢殿設浴盆二。受水數十石。道士贊目疾入洗。龕前懸金錢一。人爭以錢擊之。中者宜子。殿前豐碑數十統。內三碑一爲天師神道碑。元趙文敏書。一爲仁壽宮碑。虞文靖集隸書。一爲昭德殿碑。趙士延書。歲之三月朔至廿八日設廟。爲帝慶誕辰。都人陳鼓樂旌旗。結綵亭乘輿。導駕出遊。觀者塞路。進香賽願者。絡繹不絕。南城右安門內。橫街之東。亦有廟祀。兩廡爲十地閻君之殿。凡有向涿鹿東山進香者。預期致祭於此。名曰發信。各廟遊人了香願畢。於長松密柳之下。取醉而歸。

孫茂枝遊東郊蝶戀花詞

帝京歲時紀勝

七 北平史蹟叢書第一種

國立北平研究院史學研究所

落盡棠梨春已暮。芳草多情纔過濛鬆雨。柳絮顛狂飛不住。秋千正在濃陰處。廟

口神絃初罷舞。畫扇輕衫隨意城東步。笑逐鈿車歸去路。酒香一行青松樹。燕都

遊覽志

時品

三月採食天壇之龍鬚菜。味極清美。香椿芽拌麩筋。嫩柳葉拌豆腐。乃寒食之佳品。黃花魚卽江南之石首。至於小葱炒麩條魚。蘆筍膾鯉花。勒鯊和羹。又不必憶蓴鱸矣。至若桃花歷亂。柳絮飛殘。紅白燦蘋婆。荷包挂牡丹。曰西府。曰鐵梗。曰垂絲。海棠之妙。韋公寺。慈仁寺。可爲甲於天下矣。冀門煙柳。爲金臺八景之一。吏部藤花。乃明少宰吳寬之手植也。

四月立夏

立夏取平日曝晾之米粉春芽。並用楊麩煎作各式果疊。往來餽遺。仍將清明柳穿之點。煎作小兒食之。謂曰宜夏。

結緣

八日爲浴佛會。街衢寺院搭苫棚座。施茶水鹽豆。以黃布帛爲懸旌。書曰普結良緣。禁屠割。都人多於愍忠寺遊玩。施齋飯僧。講經于講堂。聽講者甚夥。又爲赴龍華大會。考愍忠寺建於唐貞觀十九年。太宗愍東征士卒戰亡。收其遺骸。葬幽州城西。建愍忠寺。中有高閣。諺云愍忠高閣。去天一握是也。有聖祖御書扁四。曰大雄寶殿。曰覺路津梁。曰不二法門。曰藏經閣。雍正十二年改名法源寺。

張翥登愍忠寺閣詩。

百級危梯遡碧空。凭闌浩浩納長風。金銀宮闕諸天上。錦繡山川一氣中。事往前朝僧自老。魂來滄海鬼猶雄。只憐春色城南苑。寂寞餘花發舊紅。蛻菴集

天仙廟

京師香會之勝。惟碧霞元君爲最。廟祀極多。而著名者七。一在西直門外高梁橋曰天仙廟。俗傳四月八日神降。傾城婦女往乞靈祐。一在左安門外弘仁橋。一在東直門外曰東頂。一在長春闌西曰西頂。一在永定門外曰南頂。一在安定門外曰北頂。一在右安門外草橋曰中頂。又有涿州北關懷柔縣之髻髻山。俱爲行宮祠祀。聖祖御題髻髻

山天仙殿扁曰敷錫廣生。玉帝殿扁曰清虛真宰。每歲之四月朔至十八日。爲元君誕辰。男女奔趨。香會絡繹。素稱最勝。惟南頂於五月朔始開廟。至十八日。都人獻戲進供。懸燈賽願。朝拜恐後。有御題扁曰神燭碧虛。嶽殿扁曰功成出震。

藥王廟

都城藥王廟極多。其著名者四。一在東直門內曰東藥王廟。一在地安門外西步量橋曰西藥王廟。一在安定門內之西曰北藥王廟。一在天壇之北曰南藥王廟。爲明武清侯李誠銘立也。歲之四月中旬至廿八日。爲藥王誕辰。香火極勝。惟除夕至元旦。徹夜不斷。拜廟進香者。多不得入廟。於神路街外設香池數處。焚香遙拜。廟西爲金魚池。有養朱魚。以供市易。都人入夏。結棚列肆。狂歌轟飲于池沼之上。舊傳有瑤池殿。今不可尋矣。居人界池爲塘。植柳覆之。歲種金魚以爲業。池陰一帶。園亭甚多。南抵天壇。蘆葦兼葭。一碧萬頃。昔我王父楚險公曾築室於此。顏曰蘆屋。今雖莫詳其處。尙有存圖。以示來許。至於遊覽之地。如西山妙峰弘教聖感潭。柘顯應。西域戒壇香山碧雲法海臥佛寺等寺。極稱名勝。歲之四月。都人結伴聯鑪攢聚香會而往遊焉。

歐陽原功漁家傲詞

四月都城冰碗凍。含桃初薦瑛盤貢。南寺新開羅漢洞。伊蒲供。楊花滿院鶯聲哢。
歲幸上京車駕動。近臣准備變輿從。健德門前飛玉鞚。爭持送。葡萄馬乳歸銀甕。
圭齋集

郝敬西山作

西山三百寺。十日徧經行。歸與家人語。山多不記名。畿輔通志

豐臺芍藥

京都花木之盛惟豐臺芍藥。甲於天下。舊傳揚州劉貢父譜三十一品。孔常父譜三十三品。王通叟譜三十九品。亦云瑰麗之觀矣。今揚州遺種絕少。而京師豐臺於四月間。連畦接畛倚擔市者日萬餘莖。遊覽之人。輪轂相望。惜無好事者。圖而譜之。如宮錦紅。醉仙顏。白玉帶。醉楊妃等類。雖重樓牡丹亦難爲比。考豐臺本無臺。金時郊臺在南城外。豐宜門者金之南門也。豐臺疑即拜郊臺。因門曰豐宜。固目爲豐臺云耳。今右安門外十里草橋。唐時有萬福寺。寺廢而橋存。明天啓間。建碧霞元君廟其北。土近泉宜花。帝京歲時紀勝

九 北平史蹟叢書第一種
國立北平研究院史學研究會

居人以種花爲業。冬則蘊火暄之。十月中牡丹已進御矣。橋去豐臺十里。中多亭館。元廉右丞之萬柳堂。趙參謀之匏瓜亭。栗院使之玩芳亭。要在彌望間。然莫詳其處矣。

馬之駿秋日草橋作

白屋村村度。青帘面面迎。野溪殘雨入。側樹早陰生。梨棗過橋色。鷄豚近市聲。未論坵與壑。出郭已多情。馬仲良詩集

時品

薦新菜果。王瓜櫻桃。瓠絲煎餅。榆錢蒸糕。蠶豆生芽。蒿苣出筍。乃時品也。花名玫瑰。色分真紫。鵝黃。樹長娑羅。品重香山。臥佛。青蒿爲蔬菜。四月食之。三月則採入藥爲茵陳。七月小兒取作星燈。諺云三月茵陳四月蒿。五月六月砍柴燒。

五月端陽

五月朔家家懸硃符。挿蒲龍艾虎。窗牖貼紅紙吉祥葫蘆。幼女剪綵疊福。用軟帛緝逢老健人。角黍蒜頭五毒老虎等式。抽作大紅硃雄葫蘆。小兒佩之。宜夏避惡。家堂奉祀。蔬供米粽之外。果品則紅櫻桃黑桑椹。文官果八達杏。午前細切蒲根伴以雄黃。曝而